


**TEZAUUR LITURGIC**  
**7 MARTIE**

**ACATISTUL**  
**SOBORULUI**  
**SF. CHERSONULUI**



**MOSCOVA, 2000**



# Акафист

## СОБОРУ ХЕРСОНСКИХ СВЯТЫХ

### Кондак 1

Избраннии благочестия подвижницы, светом истины Христовы озареннии и лучами благодати Божия землю нашу облиставшии, теплым предстательством вашим ограждаеми, похвальная восписуем вам, святым заступником нашим. Вы же, яко дерзновение ко Господу имущии, от всяких нас бед свободите, да зовем вам: Радуйтесь, вси святии земли Херсонския, молитвенницы о душах наших.

### Икос 1

Ангели земнии и человецы Небеснии воистину явились есте, святителие, мученицы, преподобнии и праведнии земли Херсонския, равноангельное бо житие на земли поживше, воздаяние от Вседержителя на Небесех восприяли есте; темже славим вас, яко верных предстателей наших, и зовем вам хвалебно:

Радуйтесь, сеятелие добраго семене, слова Божия.

Радуйтесь, раздавателие коемуждо на пользу даров духовных, яже прияли есте от Господа.

Радуйся, Апостоле Андрее Первозванный, яко закон Евангельский нам благовестил еси.

Радуйся, яко по водам Борисфёна к нам востёкл еси.

Радуйся, священномучениче Капитоне, святителю Херсонесский, яко люди твоя правой вере научал еси.

Радуйся, яко за Христа, идеже ныне град Херсон, мученическую кончину от неверных приял еси.

Радуйтеся, вси святии земли Херсонския, молитвенницы о душах наших.

### **Кондак 2**

Видев Господь чистоту душ ваших, славнии благочестия подвижницы, и сердца, любовь к Нему, преисполненныя, призва вас, да послужите спасению многих; темже, свыше просвещаемии, утверждали есте веру православную в людех, научая ангельски пети Господеви: Аллилуиа.

### **Икос 2**

Разум чист и свободен от страстей испросите нам, угодницы Божии, да суетная в мире сем

поправше, житию вашему подражаем, вопиюще вам таковая:

Радуйтесь, яко путем узким и прискорбным Христу последовали есте.

Радуйтесь, яко Горних обителей достигнути вожделели есте.

Радуйся, святителю Иннокентие, прославлению Касперовския иконы Владычицы послуживый.

Радуйся, писаньми твоими богодухновенными души и сердца верных просветивый.

Радуйся, праведный флотоводче воине Феодоре, града Херсона Небесный покровителю.

Радуйся, бедствующим добрый предстателю и за обидимых и унижаемых присный ходатаю.

Радуйтесь, вси святии земли Херсонския, молитвенницы о душах наших.

### **Кондак 3**

Силою Божиею укрепляеми, святии, все житие ваше в праведности и служении Богу проводили есте, Творцу, в трудех и подвизах вам вспомоществующу, воспевая благодарно: Аллилуиа.

### Икос 3

Имея в сердцах своих веру непоколебимую во Христа Иисуса, святии угодницы Херсонстии, благочестно со тцанием Ему послужили есте. Темже, прославляюще Бога, дивнаго во святых Своих, ублажаем вас, яко Небесных покровителей наших, вопиюще таковая:

Радуйтесь, яко на стезю спасения наставляя, многия в Царствие Небесное управили есте.

Радуйтесь, яко подвиги и труды вашими землю нашу освятили есте.

Радуйся, преподобне отче Феодосие, Григорие-Бизюковы обители славный основателю.

Радуйся, уставов святых отцев ревностный исполнитель и подвизающихся о Господе мудрый наставниче.

Радуйся, преподобномучениче Парфение, игу Христову всецело подклонивыйся и всего себе воли Божией предавший.

Радуйся, мученическую кончину претерпевый и от Господа венец нетленный восприявший.

Радуйтесь, вси святии земли Херсонския, молитвенницы о душах наших.

## Кондак 4

Бурею страстей и треволнений мира сего непоколебимы пребывше, святии угодницы, в тихое пристанище спасения души ваша управили есте: вся бо благая и красная мира презрев, странниками и пришельцами себе на земли помышляли есте, Небеснаго отечества взыскуя и Господеви вопия: Аллилуиа.

## Икос 4

Слышаще поучения и наставления ваша, яже не то́чию в словесех, но и житием вашим явили есте, святии, прихождаху к вам издалеча жаждущии спасения, подражати добродетелем вашим хотяще. Мы же, сердца́ми умиляющеся, духом же к Небеси устремляясь, вам, целителям душ наших, вопием сице:

Радуйтесь, Церкви Херсонския славо и земли нашей украшение.

Радуйтесь, с Небесе на нас присно взирающии и на стезю спасения нас наставляющии.

Радуйся, священномучениче Прокопие, паствы Херсонския преславный святителю и града нашего милостивый покровителю.

Радуйся, сущих во тьме неверия ревностный просветителю и душ человеческих от суеты житейския мудрый восхитителю.

Радуйся, пресвитере Иоанне, мужественно на смерть за Христа с архипастырем своим шествовавший.

Радуйся, от Небеснаго Пастыреначальника праведное воздаяние восприемый.

Радуйтесь, вси святии земли Херсонския, молитвенницы о душах наших.

### **Кондак 5**

Боготечныя звёзды явились есте, святии угодницы, небо церковное украшающии и всю землю Херсонскую светом добродетелей ваших осиявающии, плавающих во мраце житейских попечений к тихому пристанищу Царствия Небеснаго выну наставляя и ко спасению всех приводя, да вопиют вси Богу: Аллилуиа.

### **Икос 5**

Видя, яко в мире сем, во зле лежащем, несть житейския сладости печали непричастны, многоскорбное житие восприяли есте, святии угодницы Божии. Мы же, грешнии, ублажающе терпение ваше, зовем вам таковая:

Радуйтесь, подвигом добрым подвизавшиися.

Радуйтесь, образ подражания нам явившии.

Радуйся, священномучениче Павлине, иноческаго жития измлада вожделевый и всего себе на служение Богу предавый.

Радуйся, многия скорби и труды подъявый и вся сия ради Господа претерпевый.

Радуйся, священномучениче Парфение, любви Божией образ нам в себе явивый и за Христа душу свою положивый.

Радуйся, яко тобою вера истинная прославляется и благочестие утверждается.

Радуйтесь, вси святии земли Херсонския, молитвенницы о душах наших.

### **Кондак 6**

Проповедует край Херсонский подвиги и труды ваша, угодницы святии, и светло красуется, стяжав вы помощники и покровители себе. Сего ради к вашему заступлению в скорбех наших прибегаем и просим: воззрите на нас, грешных, и святыми и благомошными вашими молитвами ко Господу мир душевный нам испросите, во еже пети во умилении: Аллилуиа.

## Икос 6

Возсияли есте́, яко свети́ла богосветлая, угодницы́ Божии, светно́сными лучами подвигов ваших и добродетелей всех просвещающи и горением любви́ вашей ко Господу сердца́ наша воспаляющи. Сего ради вопием вам:

Радуйтесь, на высоту добродетелей возшедшии.

Радуйтесь, блаженную жизнь обретшии.

Радуйся, священномучениче Анатолие, Церкви торжествующия на Небеси изрядное украшение.

Радуйся, Церкви воинствующия на земли́ крепкое вспоможение.

Радуйся, преподобноисповедниче Антоние, Церкви Христовы мудрый святителю.

Радуйся, Корсунския обители Небесный покровителю.

Радуйтесь, вси святии земли́ Херсонския, молитвенницы о душа́х наших.

## Кондак 7

Хотяй Господь всем человеком спастися, вас, угодницы святии, яви людем земли́ Херсонския

яко светильники пресветлыя, да сиянием добродетельнаго жития вашего озаряеми, в добродетелех христианских утверждаемса, поя непрестанно: Аллилуиа.

### **Икос 7**

Новое знамение благоволения Божия даде́ся нам в явлении сонма святых угодников Херсонских: святителей и преподобных, мучеников и исповедников, дóбре подвиг совершивших и веру соблюдших. Мы же, притекающе к молитвенному их предстательству, яко благодарованным заступником нашим приносим сия похвалы:

Радуйтесь, в Законе Господни вы́ну непорочно ходившии.

Радуйтесь, высокий образ добродетелей в житии вашем явившии.

Радуйся, священномучениче Ону́фрие, Небеснаго Владыки ра́бе благый и верный.

Радуйся, яко мученическою кончиною твоею в радость Господа твоего вшел еси.

Радуйся, священномучениче Антоние, земли́ Херсонския доброе прозябение, во дни лютыя от безбожных оклеветания и гонения претерпевый.

Радуйся, кровию своею веру во Христа засвидетельствоваый.

Радуйтесь, вси святии земли Херсонския, молитвенницы о душах наших.

### **Кондак 8**

Странники и пришельцы быти себе в мире сем помышляя и горняго Иерусалима непрестанно взыскупа, течение временныя жизни скончали есте, святии, и ныне Престолу Божию предстоя и вечныя радости наслаждающиеся, поете Царю Славы Христу: Аллилуиа.

### **Икос 8**

Вся попечения житейская отложше и самех себе отвергшися, неуклонно Христу последовасте, святии земли нашея, и ныне в вышних пребывая, и нас, земных, не оставляете вашими молитвами и предстательством ко Господу, вопиющих вам таковая:

Радуйтесь, всех человек святою любовью возлюбившии.

Радуйтесь, во еже некия спасти, всем вся бывшии.

Радуйся, преподобномучениче Геннадие, олтаря Господня достойный служителю и покаяния неусыпный проповедниче.

Радуйся, Григорие-Бюзюковы обители молитвенниче и иночествующих добрый наставниче.

Радуйся, преподобне отче Варсоно́фие, страдания за Христа безропотно переносивый и многолетния заключения благодушно претерпевый.

Радуйся, по трудех и подви́зех земных упокоение блаженное восприявый.

Радуйтесь, вси святии земли́ Херсонския, молитвенницы о душа́х наших.

### **Кондак 9**

Всякое естество Ангельское удивися, зряще вас, святии земли Херсонския, како вы труды и бдения, гонения и поношения, злострадания и раны Христа ради на земли́ подъяли есте. Темже и мы, ублажающе подвиги ваша, прославльшему вас Богу вопием: Аллилуиа.

## Икос 9

Витии многовещаннии не возмогут по  
достоянию восхвалити подвиги ваша, святии  
угодницы Божии, тем паче мы, убозии словом,  
недоумеем кийими похвальными пёсньми  
прославити вас; обаче любовью подвизаемии,  
дерзаем венчати вас сими словесы:

Радуйтесь, Евангелия Христова вернии  
послушателие.

Радуйтесь, заповедей Господних ревностнии  
исполнителие.

Радуйся, священномучениче Александре,  
кротостию Христовою и молитвою врагов  
возношения низложивый.

Радуйся, священномучениче Матфее, яко  
крóвными каплями твоими огонь богоборчества  
угасив, Христову Церковь богáтно напоил еси.

Радуйся, священномучениче Димитрие, яко  
Крест Христов на рамена своя взял, ни мук, ни  
страданий не убоялся еси.

Радуйся, яко в день Воздвижения, со крестом  
исповедническим Небеса прошел, сонм  
мучеников восполнил еси.

Радуйтесь, вси святїи земли Херсонскїя,  
молитвенницы о душах наших.

### **Кондак 10**

Спасти́ся хотя́ще от различны́х напа́стей и бед,  
вас, святїи уго́дницы Херсо́нстїи, призываем:  
не тще́тну у́бо сотворите надежду нашу на  
заступле́ние ваше, бу́дите нам защитницы  
необори́мии от враг видимых и невидимых, да  
спасе́ннии вашими молитвами, хвалебными  
гласы́ зовем: Аллилуиа.

### **Икос 10**

Стена и прибежище бу́дите нам, святїи,  
огражда́я нас молитвами вашими от всех  
наве́тов вражиих и низпосыла́я нам, грешным,  
вся благопотре́бная ко спасению, да  
благодарственно вам вопи́ем:

Радуйтесь, светильницы, в мире сем  
добродетельми сияющїи.

Радуйтесь, к Богу и ближним любовью горящїи.

Радуйся, священноиспове́днице Филосо́фе,  
Христа Иисуса пред человеки испове́давай.

Радуйся, страдания лю́тая от безбожных  
безропотно претерпевый.

Радуйся, мучениче Стефане, яко за веру православную в заточении много пострадал еси.

Радуйся, яко вся страдания претерпев, душу твою в руке Бога Живаго предал еси и победоносно в чертог Небесный возшел еси.

Радуйтесь, вси святии земли Херсонския, молитвенницы о душах наших.

### **Кондак 11**

Пение молебное во умилении приносим вам, угодницы Божии, и с любовью теплою ко иконе вашей припадающе, благодарим Христа Бога, даровавшего земли Херсонстей таковых заступников и молитвенников, вопиюще Ему: Аллилуиа.

### **Икос 11**

Светозарнии звёзды явились есте, всеблаженнии, всю землю Херсонскую светом боговѣдения освещая и мрак безбожия далече отгоняя, темже и наша сердца, грехми отягченныя, просветите и к покаянию возведите, да зовем вам:

Радуйтесь, веры Христовы безбоязненнии проповедницы.

Радуйтесь, имени Иисусова мужественнии исповедницы.

Радуйся, преподобная мати Евтро́пие, в житии твоем едину надежду то́кмо на Господа полагавшая.

Радуйся, край Херсонский молитвою твоею облагоухавшая.

Радуйся, блаженная мати Домни́ко, образ терпения и незлобия нам являющая.

Радуйся, ищущим спасения путь в Царствие Небесное указующая.

Радуйтесь, вси святии земли́ Херсонския, молитвенницы о душа́х наших.

### **Кондак 12**

Благодать, данную вам от Бога, и вѣлие милосердие ваше к страждущим вѣдуще, вас, святии угодницы Божии, прилежно просим: пролейте ныне теплую молитву о нас, грешных, ко Господу, да презрев вся наша прегрешения, дарует нам мирное и безмятежное житие пожити, да покаянием очистившеся, сподобимся кúпно с вами воспевати Ему: Аллилуиа.

## Икос 12

Поюще равноангельное житие ваше, вси святии земли Херсонския, ублажаем вас, яко многомо́щных молитвенников о нас пред Господем, теплых заступников и наставников ко спасению, и со умилением приносим вам пения сия:

Радуйтесь, яко предстательством вашим земля Херсонская от бед и напáстей избавляется.

Радуйтесь, яко вами имя Господне во всех предéлах страны нашея прославляется.

Радуйтесь, алчущим и жаждущим правды глаголов жизни вечныя возвестителие.

Радуйтесь, ищущим Царствия Небеснаго пути спасительнаго указателие.

Радуйтесь, угодницы Божии, предивнии в чудесех.

Радуйтесь, избранницы Христовы, неутомимии в подвизах.

Радуйтесь, вси святии земли Херсонския, молитвенницы о душа́х наших.

## Кондак 13

О всехвальнии угодницы Божии, вси святии земли Херсонския! Малое сие моление наше, в похвалу вам приносимое, милостиво примите и теплым предстательством вашим пред Господем спасение душам нашим испросите, да во Царствии Небеснем да купно с вами воспеваем Ему: Аллилуиа.

*(Этот кондак читается трижды, затем икос 1 и кондак 1)*



**ПОЛНЫЙ  
АКАФИСТНИК  
КАНОНИЧЕСКИЙ**

**АКАФИСТЫ  
КО ГОСПОДУ БОГУ  
ПРЕСВЯТОЙ  
БОГОРОДИЦЕ  
АРХАНГЕЛАМ  
И АНГЕЛАМ**

†

НОВОЕ  
НЕБО